

Prome Ministro, den entrevista exclusivo cu DIARIO:

Un dia historico y sin precedente pa Aruba

ORANJESTAD (AAN) - "Awe ta un dia historico y sin precedente pa Aruba. Awor numa nos ta cla pa entrega, responsablemente, e derecho pa bay bora y asina confirma e presencia di petroleo of gas bao lama rond di Aruba. E perspectiva ta muestra alentador y ohala e isla aki por ta bendiciona di tal forma cu e resultado enberdad por ta positivo y comercialmente atractivo", Prome Ministro Oduber a bisa DIARIO den un entrevista exclusivo ayera tardi, prome cu firmamento di e contrato pa exploracion y explotacion di petroleo cu e compania Hamilton International. E firmamento mes lo tuma lugar awe mainta 10or den sala di Parlamento.


"E proceso largo, esta di Status Aparte, trahamento di leyman necesario, tur e tramitanan pa objetivamente yega na e destaho publico, y concretizacion di e contrato aki, sin duda, ta un logro grandi pa e pueblo di Aruba", Prome Ministro Nelson Oduber a declara.

"Un pueblo chiquito, pero cu curazon grandi y cu hendenan

balente y determina pa persevera y logra nan meta. Manera ta di compronde, hopi hende, den pasado y awe, a contribui den un forma of otro pa realizacion di e soño aki. Awe nos ta orguyoso di por firma, den nomber di tur esnan den pasado y awe, e contrato aki, simbolo di un esperanza nobo, un futuro briyante y principalmente un empuje economico sin igual", el a bisa den e entrevista exclusivo cu DIARIO.

"E dos objetivonan mas principal cu nos gobierno ta considera di gran envergadura, y cu lo mester ta ariba cualque ideologia politico ta: 1. Control ariba desaroyo engeneral, y 2. Obtene e maximo beneficio pa nos pais Aruba, di tal forma cu e ciudadanonan di Aruba lo por beneficia di tal desaroyo.

Finalmente Prome Ministro Oduber a bisa: "mi kier na final pa enfatiza cu den e fase di exploracion, e objetivo di nos gobierno ta pa garantiza e exploracion maximo, cu suficiente boramento. Esaki ta pa sigura cu hopi trabao lo worde genera den e fase aki. Hopi



servicio adicional manera di helicopter, boto, warehousing, mantencion general, catering, y tanto mas, lo duna un estimulo extra na nos economia y trece e diversificacion necesario".

"Pa loke ta trata objetivo y strategia, e strategia di nos gobierno pa cu desaroyo di petroleo ta, entre otro, percura pa exploracion tuma lugar rapidamente pero adecuadamente, di acuerdo cu e stipulacionnan di e contrato. Evaluacion, cu diligencia, di e resultadonan di tal exploracion. Desaroya den un forma responsable, e descubrimientonan. Extrae un produccion maximo di cada reservoir", Prome Ministro a enfatiza na DIARIO.